

CONVENIO DE COLABORACIÓN ENTRE A AXENCIA DE TURISMO DE GALICIA E O CONCELLO DE RIBADEO PARA A REPARACIÓN DA ESTRADA DE ACCESO Á COSTA EN VILAFRAMIL

MEMORIA XUSTIFICATIVA

O xerente de Turismo de Galicia

DECLARA:

Que esta Axencia de Turismo de Galicia formalizou co Concello de Ribadeo o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2025.

Que o instrumento convencional ten por obxecto establecer as bases de colaboración entre a Axencia de Turismo de Galicia e o Concello de Ribadeo para reparación da estrada de acceso á costa en Vilaframil.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

Primeiro.- A Axencia de Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en relación coa promoción da calidade e a innovación, o desenvolvemento, mellora, información e difusión do sector turístico galego, potenciando a devandita oferta, mediante a comercialización, información e difusión do produto turístico da Comunidade Autónoma de Galicia.

Para lograr esta finalidade a Axencia de Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.



Segundo.- O Concello de Ribadeo pretende mellorar as infraestruturas locais co fin de poñer en valor o seu patrimonio cultural e dalo a coñecer ás persoas visitantes. Para iso mellorará as características superficiais do pavimento existente mediante un firme de aglomerado en quente, así como a limpeza de cunetas e as obras de fábrica necesarias. As obras terán lugar na parroquia de Vilaframil, concretamente no camiño que da acceso ao núcleo de San Lourenzo e que comunica coa costa.

Tanto o Plan Xeral de Ordenación Municipal de Ribadeo coma o Plan Básico Autonómico de Galicia recollen distintos elementos dentro do catálogo de patrimonio cultural de indiscutible interese turístico e atractivo cultural, dentro da contorna do núcleo de San Lourenzo. Entre eles inclúense a Capela de San Lourenzo e unha decena de hórreos. Os hórreos galegos teñen unha especial consideración na Lei de patrimonio cultural de Galicia, dentro do apartado referido ós bens que integran o patrimonio etnolóxico. Dentro do dito apartado recóllense os lugares, bens mobles e inmobles, as expresións así como as crenzas, coñecementos, actividades e técnicas transmitidas por tradición, que se consideren relevantes ou expresión testemuñal significativa da identidade, a cultura e as formas de vida do pobo galego ao longo das historia. Ós hórreos do núcleo de San Lourenzo recoñécenselle un especial valor cultural, principalmente etnolóxico.

As obras que reflicte o presente proxecto son as seguintes:

Este camiño presenta un estado do pavimento en mal estado, ten un ancho actual de rodada moi variable, segundo os tramos, variando entre os 4,00 m no sitio mais estreito e os 4,50 m no máis ancho.

O primeiro tramo vaise ensanchar, pasando de 4,00 a 4,20 m de ancho de calzada. Este sobreecho vaise afirmar con grixo artificial e posteriormente levará todo o ancho unha capa de mesturas bituminosas en quente de 5 cm. de espesor, tipo AC-16 SURF/ 50-70 D. Neste primeiro tramo leva un sobreecho diante das vivendas, que é terreo público, para facilitar o acceso, pois o estado actual sobre todo en época de choivas, é dificultoso. Previamente ó afirmado é necesario afirmar esta zona de sobreecho cunha capa de grixo artificial. Para solucionar a diferenza de niveis entre a calzada e a zona de sobreecho vaise poñer unha levada que recolla as augas.

No resto da pista mantéñense os anchos actuais, polo que soamente é necesarios botarlle unha capa de mesturas bituminosas en quente de 5 cm de espesor, tipo AC- 16



SURF/ 50-70 D. Na zona das vivendas de San Lázaro proxéctase un bordo cuneta, o que permitirá a recollida das augas de choiva e unha sensación de mais anchura neses tramos.

O camiño ten una lonxitude total de 400 metros.

As coordenadas de inicio e final son as seguintes:

Actuación	Coordenada X	Coordenada Y
Inicio	654.227,23	4.822.626,93
Fin	654.304,15	4.822.982,82

Basicamente as obras consistirán en:

- Limpeza de cunetas e corredores.
- Varrido de superficie sobre a que se aplicará un rego de imprimación.
- Afirmado dos tramos que se ensanchan e dos sobreanchos cunha capa de grixo artificial de 20 cm.
- Capa intermedia de aglomerado en quente de 6 cm. de espesor nos tramos finais do camiño para regularización e tapado de fochancas.
- Capa de rodadura de aglomerado en quente de 5 cm de espesor ao longo de todo o camiño.
- Sinalización vertical.

Con esta actuación quérese potenciar un elemento patrimonial do concello, favorecendo o uso e goce do entorno por parte de veciños e visitantes, revalorizando o patrimonio e fomentando o turismo patrimonial como un instrumento de reequilibrio territorial, o que supón a posta en valor turístico da citada infraestrutura.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.



En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela

O xerente de Turismo de Galicia

Antonio Casas Calviño

